

CIV.

Le Prince d'Orange à Wesenbeke. Il le remercie de l'avoir averti des mauvais desseins du duc d'Albe. Animosité des Hollandais contre les Espagnols. Bodleian libr. Ms. St. Amand 4 fol. 25.

1571, le 11^e Mai.

—

Wesenbeke, J'ay par ce porteur receu vostre lettre du iiij^e de ce mois et auparavant une aultre par Jehan Coenensz. J'ay veu la spécification que vous m'envoyez de tous les blancz signetz qu'avez eu de moy, desquelz comme vous m'escripvez vous en restent encoires dix. Je suis content que vous les gardez chez vous, sans en distribuer aucuns jusques à ultérieure ordonnance mienne. Je vous remerchie du fidel advertissement que vous me faictes de celluy, qui seroit aposté du duc d'Alve pour me venir faire quelque mauvais tour. J'espère que le Sr Dieu m'en préservera, et ce pendant toutesfois je seray sur ma garde.

J'entends par vostredicte lettre assez l'altération qui est par toute la Hollande et ailleurs contre le duc d'Alve et aultres Espaignolz, mais tant et si longuement qu'ilz ne vuellent monstrier aultres effectz pour leur délivrance, la seule volonté ne nous peult aider. Toutesfois il sera bon que ceulx qui ont quelque crédit vers eulx les entretiennent tousjours en ceste bonne affection. Et en cest endroit pour fin de ceste je prieray Dieu vous avoir en sa très-saincte garde. Escript à Dillenberch ce Xje jour de May 1571.

Vostre bon amy
GUILLAUME DE NASSAU.

*A Mre Jacques de Wesenbeke
Docteur en droict.*

R. 16 Majj Essen. respondi [18?] ¹.

¹ Notice de Wesenbeke.

~~~~~